



**Inuiattut erinarsuutitsinni marluusuni sorleq pisortatigoortumik atorneqassanersoq nutaamilluunniit taarserneqartariaqarnersoq pillugu apeqquteqaat aallaavingalugu oqallinnissamik siunnersuut.**

(Inatsisartunut Ilaasorta, Aqqalu C. Jerimiassen, Atassut)

Inuiattut erinarsuutigit pillugit Inatsisartunut ilaasortap Aqqalu C. Jerimiassenip oqallissaarummik matuminnga qaqitsineranut qujanaq. Sammisag imminut paasinitinnut, oqaluttuarisaanitsinnillu equivoq.

Nunarput, annertuumik ataqatigiittumillu oqaluttuassartaqarpoq. Ilutigisaanik inuiattut erinarsuutit taakkua marluk ullumikkut ilisimasagut pilernerinit, inuiaqatigiit annertuumik ineriartornikuupput. Sorpassuit allangornikuupput, avatangiiserpullu "Nunarput utoqqarsuanngoravit" aamma "Nuna asiilasooq" allanneqarnerinit allangornikuulluni. Tamanna pillugu inuiattut erinarsuuterput ullutsinni inuiaqatigiinnut naapertuunnersoq eqqartussallugu pisariaqarsinnaaneraniq eqqarsaammut paasinnissinnaavugut.

Taakkua oqaatigereerlugit, inuiattut erinarsuutigit pillugit oqallinnerit suulluunniit toqqammavitsinnut annertuumik ataqqinnilluni ingerlanneqarnissaat Demokraatinut aalajangiisuuvoq. Ullumikkut erinarsuutigit taalliaannaanngillat. Siuaasatsinnut, kinguaariinnilu siulitsinnut nuannaarlutik, pimoorussinerminnilu inuiattut erinarsuutitsinnik erinarsorsimasunut atassutaapput. Ataatsimut kinaassutsitsinnut ilaavoq, piffissallu akimorlugit ataqatigiissilluta. Pingaartitaapput mianerisassagut.

Tamanna pillugu nutarsaasoqassappat tamanna oqaluttuatsinnik kipititsinerussanngitsoq, nangitsinerussasorli uagutsinnut pingaaruteqarpoq. Qanga pisimasut, ullutsinnilu pisut akerleriittutut inissinneqassanngillat, sorlaqarfiilli ataqqineqartuarlutik ataqatigiittutut isigineqassallutik.

Maani nunami oqaatsitigit assigiinngissuseq siunnersuuteqartup aamma tikkuarmagu nuannaarutigaarput. Qaanaarmiut, Tunumiullu oqaasiisa akuutinneqarnissaannik eqqarsaat sakkortuumik takussutissiivoq. Nunami sumi najugaqaralarutta, sumiorpaluutigullu apeqqutaatinnagit inuiattut erinarsuut tamatsinnik inissaqartitsisariaqarpoq. Assigiinngissutsigit erinarsuummi ataatsimi ataatsimoortinneqarsinnaaneri, ataatsimoornitsinnut aamma ataqatigiinnitsinnut kusanartumik ersiutaassaaq.

Massakkut inuiattut erinarsuutigit oqaluttuarisaaneq ataqqillugu, eqqarsaatigalugu, paasillugulu suliaq ingerlanneqassasoq isumaqatigiissutigineqartillugu, Demokraatit ammasumik isumaqarlutik oqallinnermut matumunnga peqataassapput.

Tassunga atatillugu aalajangiisoqassappat, aalajangiineq inuianni siammasissumik tunngaveqarluni pinissaanik Naalackersuisut oqaaseqaataat maluginiarparput. Tamatumunnga tunngaviusumik



isumaqataavugut. Inuiattut erinarsuut kinaassutsimut tunngassuteqarpoq, innuttaasullu tusaaneqartutut aamma akuutinneqartutut misigisimanissaat pingaaruteqarluni. Innuttaasut akuutillugit ingerlatsineq – matumani ilaatigut taasisitsisinnaneq – taanna aqutigissallugu toqqaraanni innuttaasut akuutinnissaat, piginneqatigiinnissallu qulakkeerneqarnissaanni aqutaasinnaavoq.

Oqallinnerup nukingiunneqannginnissaa, avissaartuutsitsinanilu ataatsimoortitsisumik oqallisigineqarnissaa Demokraatinut pingaaruteqarpoq. Inuiattut erinarsuuterput – imaluunniit inuiattut erinarsuutigut – maani, nunarpullu avammut takutinneqartillugu ataatsimoorfigisinnaassavarput.

Tamanna pillugu qanga pisimasut, siunissattalu qanoq pitsaanerpaamik kattussinnaanerigut pillugit tungavilersorluakkamik, ataqqinnittumillu oqallinnissatsinnut qilanaarpugut.